

25.novembar – Dan državnosti

Trajemo...prkosimo...



Bosna i Hercegovina je u svome hiljadugodišnjem državno – pravnom razvoju prolazila kroz različite oblike organizacije vlasti i različite pravne sisteme. Kada se govori o bosanskoj državnosti jedna od prvih stavki od koje treba krenuti je svakako prvi pomen imena Bosne u X stoljeću, u djelu bizantskog cara Konstantina VII Porfirogenita.

Od prvog pomena u historijskim izvorima polovinom X stoljeća pa do sredine XII stoljeća Bosna je stekla visok stepen državnosti što dokazuje pisanje bizantskog pisca Ivana Kinama iz tog vremena da „ Bosna nije podložna...nego je sama za sebe; narod koji svojim zasebnim životom živi i slobodom upravlja“.

Kinam se ističe još jednim svjedočanstvom o Bosni kada kaže da je:“Bosna posebna zemlja sa posebnim narodom i jasno se izdvaja od susjednih zemalja“.



Ovo svjedočanstvo potiče iz vremena bosanskog bana Borića (1154 – 1164.).

Iz vremena bana Kulina (1180 – 1204) datira Povelja bana Kulina koja se smatra rodnim listom bosanske

državnosti.



Srednjovjekovna bosanska država je svoj najveći uspon doživjela u vrijeme kralja Tvrtka I Kotromanića.

Godine 1463.godine nakon osmanskog osvajanja područja naše zemlje, u političku historiju odlazi ugledno Bosansko kraljevstvo.

Odmah nakon što je srušeno ugledno kraljevstvo, osmanske vlasti su na njenom matičnom



teritoriju osnovale Bosanski sandžak koji će 1580.godine prerasti u Bosanski ejalet ili pašaluk čime je održan političko – teritorijalni kontinuitet i Bosna je zadržala i sačuvala svoje historijsko, geografsko, političko i narodno ime.

Bosna kao zemlja u državnompravnom i teritorijalnom pogledu postoji nešto više od 1000 godina, a njene granice su se oblikovale kroz niz ratova i

međunarodnih mirovnih ugovora .



Teritorijalni integritet Bosne i Hercegovine ostao je netaknut i nepovrijeđen tokom svih 40 godina austrougarske uprave, a prema članu 1.

bosanskog Ustava od 17. februara 1910. godine, Bosna i Hercegovina predstavlja „jedno jedinstveno posebno upravno područje“.

U trenutku raspada Austro – Ugarske, u jesen 1918. godine Bosna i Hercegovina je u svojim historijskim granicama ušla u sastav Države Slovenaca, Hrvata, Srba, a 1. decembra 1918.godine u okvir Kraljevine Srba, Hrvata, Slovenaca.

Teritorijalna cjelovitost Bosne i Hercegovine potvrđena je Vidovdanskim ustavom, prvim ustavom Kraljevine SHS.

Političko – teritorijalni kontinuitet Bosne i Hercegovine je narušen za vrijeme Šestojanuarske kraljeve diktature, kada je Zakonom o nazivu i podjeli Kraljevine Jugoslavije je razbijeno političko – teritorijalno jedinstvo Bosne i Hercegovine.

Oživljavanjem ideja Ilije Garašanina atak na Bosnu i Hercegovinu je nastavljen sporazumom Cvetković – Maček i formiranjem banovine Hrvatske.

Nakon njemačke okupacije 1941. godine Bosna i Hercegovina je ušla u okvire izdajničke tvorevine i takva politika je potrajala do formiranja bosanskohercegovačkog ratnog parlamenta 1943.godine.

Na osnivačkom zasjedanju Zemaljskog antifašističkog vijeća narodnog oslobođenja Bosne i Hercegovine (ZAVNOBIH-a), održanom u Mrkonjić Gradu (Varcar Vakufu) 25. novembra 1943. godine, obnovljeni su njeno teritorijalno jedinstvo i njena DRŽAVNOST.



Sa prvog zasjedanja ZAVNOBIH-a 1943.

Tada je naglašena historijska činjenica u prisustvu vijećnika ZAVNOBIH –a „da država Bosna i Hercegovina nije ni srpska, ni muslimanska, ni hrvatska, već i srpska, i hrvatska, i muslimanska“.

Odlukama koje je ZAVNOBIH donio na svom Drugom zasjedanju, održanom u Sanskom Mostu od 30. juna do 2. jula 1944.godine, Bosna i Hercegovina je konstituisana u svojim historijskim granicama kao

država ravnopravnih građana, da bi na Trećem zasjedanju ZAVNOBIH – a u Sarajevu bila izabrana i prva poslijeratna Narodna vlada Bosne i Hercegovine.

Trajemo...prkosimo...

Prostor zemlje bosanske Rimsko carstvo je osvajalo više od stoljeća, na njemu se raspalo...;



Osmansko carstvo ga je osvajalo oko 150 godina, na njemu se raspalo...; Bečka čizma ga je gazila 40 godina a Bosna je preživjela...

Na Bosni i Hercegovini su zube polomili i oni koji su pokušali realizovati svoje velikonacionalne težnje, realizovati ideje bolesnih umova zasnovane na agresiji i genocidu.

Nakon referenduma o nezavisnosti Bosne i Hercegovine, međunarodnog priznanja i prijema u članstvo Organizacije Ujedinjenih Nacija, došlo je do agresije na Bosnu i Hercegovinu s ciljem realizacije velikonacionalnih planova te ideja ponuđenih Načertanijama i sporazumom Cvetković - Maček koji je oživljen 1991. godine u glavama lidera susjednih zemalja.



Samo zahvaljujući borcima Armije Bosne i Hercegovine danas smo u mogućnosti da govorimo o 25. novembru, Danu državnosti Bosne i Hercegovine i milenijskom postojanju.

Danas je važno istaći još jednu činjenicu – Bosnu i Hercegovinu su miru gradili, a u ratu branili njeni patrioti, hrabre bosanske gazije.

Zbog toga je naša generacija veliki dužnik naših slavni predaka i hrabrih savremenika, koji su odbranili bosansku zemlju i narod, odbranili bosansku državnost.

Zato trajemo i prkosimo.

SRETNO DOMOVINO.



Sretno moja Bosno i Hercegovino.

Koristimo ovu priliku da svim učenicima i zaposlenicima škole, te svim iskrenim patriotima čestitamo 25. novembar, Dan državnosti Bosne i Hercegovine.

